

Na osnovu člana 116. Zakona Bosne i Hercegovine o izvršenju krivičnih sankcija, pritvora i drugih mjera („Službeni Glasnik BiH,“ broj : 13/05, 53/07, 97/07 i 37/09), Ministar pravde Bosne i Hercegovine donio je Pravilnik o kriterijima za upućivanje osuđenih lica na izdržavanje kazne zatvora („Službeni Glasnik BiH,“ broj: 34/05) kao i Pravilnik o izmjenama i dopunama Pravilnika o kriterijima za upućivanje osuđenih lica na izdržavanje kazne zatvora („Službeni Glasnik BiH,“ broj : 65/05 i 83/07), i u vezi sa članom 54. Jedinstvenih pravila za izradu pravnih propisa u institucijama Bosne i Hercegovine („Službeni Glasnik BiH,“ broj: 11/05), u cilju usklađivanja normi u poretku i olakšane primjene, utvrđuje:

**P R A V I L N I K
O KRITERIJIMA ZA UPUĆIVANJE OSUĐENIH LICA
NA IZDRŽAVANJE KAZNE ZATVORA**

-„PREČIŠĆENI TEKST“-

Član 1.

Ovim Pravilnikom se uređuju kriteriji za upućivanje osuđenih lica na izdržavanje kazne zatvora u Zavodima za izvršenje krivičnih sankcija, pritvora i drugih mjera Bosne i Hercegovine (u daljem tekstu: Zavod), ili u drugim institucijama koje su utvrđene kao najpogodnije za ostvarivanje kazne zatvora.

Član 2.

Druge institucije u smislu člana 1. ovog Pravilnika su institucije iz člana 203. Zakona Bosne i Hercegovine o izvršenju krivičnih sankcija, pritvora i drugih mjera («Službeni glasnik BiH», broj 13/05, 53/07, 97/07 i 37/09 u daljem tekstu: Zakon), odnosno institucije koje odredi Ministarstvo pravde Bosne i Hercegovine (u daljem tekstu: Ministarstvo pravde BiH).

Član 3.

Sve dok Bosna i Hercegovina ne bude imala Zavode predviđene ovim zakonom, Sud Bosne i Hercegovine (u daljem tekstu: Sud BiH), pojedince može pritvoriti u pritvorske jedinice zavoda bilo kojeg entiteta, a lica koja Sud BiH osudi na zatvorsku kaznu, svoje kazne mogu izdržavati u entitetskim zavodima.

Član 4.

Nadležni organi entiteta i Brčko Distrikta za izvršenje krivičnih sankcija, pritvora ili drugih mjera će omogućiti najviši nivo saradnje sa Ministarstvom pravde BiH, Sudom BiH i Tužilaštvom BiH, u provedbi pravne pomoći i službene saradnje u izvršavanju kazni zatvora i drugih sankcija.

Član 5.

Lica prema kojima se izvršavaju krivične sankcije, pritvor i druge mjere zadržavaju sva prava, a lišavaju se prava ili se ograničavaju u pravima samo u granicama neophodnim za ostvarivanje cilja zbog kojeg su izrečene, a u skladu sa Zakonom i međunarodnim ugovorom.

Član 6.

Izvršenju krivične sankcije, pritvora i drugih mjera pristupa se kad postane pravomoćna odluka kojom su one izrečene, te ako za to nema zakonskih smetnji.

Sa izvršenjem krivične sankcije ili druge mjere može se otpočeti i prije nego što je postala pravomoćna odluka kojom je sankcija ili mjera izrečena samo ako je to zakonom posebno predviđeno.

Član 7.

Kada su ispunjeni uslovi da se pristupi izvršenju krivične sankcije, pritvora ili druge mjere, Krivično odjeljenje Suda BiH obavezno je preduzeti potrebne radnje da se izvršenje sankcije provede bez odgađanja u skladu s odredbama Zakona i ovog Pravilnika.

Izvršenje može biti odgođeno samo u slučajevima i pod uslovima predviđenim zakonom.

Član 8.

S ciljem osiguranja izvršenja kazne zatvora, predsjednik Krivičnog odjeljenja Suda BiH vrši upućivanje osuđenog lica, a ukoliko ocijeni da bi to lice, odlaskom u inostranstvo moglo osujetiti izvršenje kazne, tražit će od nadležnog organa da mu oduzme isprave koje se mogu koristiti za prelazak državne granice do izvršenja kazne.

O oduzimanju i zadržavanju isprava koja se može koristiti za prelazak državne granice izdaje se potvrda.

Član 9.

Lice prema kojem se primjenjuje krivična sankcija, mjera pritvora ili druga mjera ne plaća troškove izvršenja, osim troškova novčane kazne, kao i drugih troškova, u skladu sa Zakonom.

Za podneske, službene radnje, rješenja i druge akte u vezi sa izvršenjem sankcija ne plaća se taksa.

Član 10.

Upućivanje pravomoćno osuđenih lica na izdržavanje kazne zatvora u Zavode ili druge institucije iz člana 1., 2. i 3. ovog Pravilnika, vrši se na način i po postupku utvrđenom u članu 114. Zakona i odredbama ovog Pravilnika.

Ako se Sud koristio medicinskim nalazom, prilikom utvrđivanja općeg, fizičkog ili duševnog zdravlja pritvorenog ili optuženog lica, na osnovu pregleda, posmatranja, bolničkog

liječenja ili na drugi odgovarajući način, kopiju takve medicinske dokumentacije uz uputni akt, dostavit će Zavodu u koji je upućeno pritvoreno ili osuđeno lice na izdržavanje kazne zatvora, mjere sigurnosti ili odgojne mjere.

Krivično odjeljenje Suda BiH će kopiju uputnog akta dostaviti Ministarstvu pravde BiH u cilju vršenja nadzora nad radom Sudske uprave u vršenju poslova upućivanja osuđenih lica na izdržavanje kazne zatvora.

Član 11.

Kriteriji za upućivanje pravomoćno osuđenih lica na izdržavanje kazne zatvora su: pol, životna dob, dužina izrečene kazne, ranije izdržavanje kazne zatvora, mjesto prebivališta odnosno boravišta osuđenog, vrste mjere bezbjednosti i vrste odgojne mjere.

Sud BiH može upućivati osuđena lica u odgovarajuće zavode bilo kojeg od entiteta iz člana 13. ili 14. ovog Pravilnika, bez obzira na prebivalište, odnosno boravište osuđenog lica koji po kriterijima treba samo da odgovaraju vrsti i dužini izrečene kazne, utvrđenoj kategorizaciji zavoda, vrsti krivičnog djela, ranijoj osuđivanosti ili drugim uslovima iz stava 1. ovog člana, u vezi sa članom 10. ovog Pravilnika.

Član 12.

Izvršavanje presude Suda BiH, će se provoditi u Zavodima iz člana 3. ovog Pravilnika u skladu sa kriterijima upućivanja iz člana 10. i 11. ovog Pravilnika, programa tretmana i unutrašnjeg kućnog reda, mjesta gdje je osuđenik upućen na izdržavanje kazne zatvora, ukoliko nije u suprotnosti sa Zakonom i donesenim podzakonskim aktima Bosne i Hercegovine.

U ostvarivanju određenih prava ili pogodnosti koja se koriste van kruga Zavoda ili upućuju na drugi zavod, primjenjivat će se zakon i podzakonski akti Bosne i Hercegovine, a samo u slučaju da određena pravna situacija nije regulisana na nivou Bosne i Hercegovine, primjenjivat će se zakon mjesta izvršenja presude.

Član 13.

Prilikom upućivanja osuđenih lica od strane Suda BiH, u kazneno-popravne zavode na području Federacije BiH, ista će se smještati u zavode prema kriterijima koji su utvrđeni u Pravilniku o kriterijima za upućivanje osuđenih lica na izdržavanje kazne zatvora («Službene novine Federacije BiH», broj 64/03, 46/05, 55/05 i 10/09), ako nisu u suprotnosti sa Zakonom i ovim Pravilnikom.

Član 14.

Prilikom upućivanja osuđenih lica od strane Suda BiH, u kazneno-popravne zavode na području Republike Srpske, ista će se smještati u zavode prema kriterijima koji su utvrđeni u Pravilniku o kriterijima za upućivanje osuđenih lica na izdržavanje kazne zatvora («Službeni glasnik Republike Srpske», broj 28/08), ako nisu u suprotnosti sa Zakonom i ovim Pravilnikom.